

**Месяца октября в 13-й день
Святых священномучеников Николая и
Иннокентия, пресвитеров Новосибирских
На велицей вечерни**

Блажен муж: 1-й антифон. На Господи, воззвах: стихиры на 8, глас 8:

Приидите, восхвалим Новосибирския новомученики:/сии бо неповинно от незаконных пострадаша/и победу от Бога на безбожие улучиша,/ ныне же кровию своею спасение нам присно ходатайствуют./ Тех молитвами, Христе Боже, помилуй нас.

Мир Ликийских предивному чудотворцу тезоимените,/ новомучениче Николае,/ победоносец во страданиях показался еси,/ паству свою в вере сохранив,/ правило верыи образ кротости явил еси.

Непорочно служение Богу совершил еси,/ непорочности соименниче,/ новомучениче Иннокентие,/ молящихся тебе в вере непорочне утверди,/ да приимем от Боганетленныя венцы.

Мученик лет древних подражателие/ и новых лютых страданий причастницы,/ земли Сибирския украшение/ и града Новосибирска слава церковная,/ молитесь о воспевающих страдания ваша,/ яже за Христа претерпелиесте.

Егда Божиим поущением/ Русь Святая претерпеваше страдания велия,/ тогда Господь Помощник и Покровитель бысть во спасение избранным Своим,/ воздвизая на подвиги новомученики и исповедники Своя.

Пастырь добрый душу свою полагает за овцы своя,/ рече Пастыреначальник Христос,/ пастыри добрыя Николая и Иннокентия/ приводя, яко свидетели крестных страданий Своих,/ тии бо сопричастницы страстей Христовых быша/ и в крепости своей силу Воскресения Его явиша,/ путь указующе нам в Царствие Небесное.

Христу, нашего ради спасения пострадавшему/ и воскресшему в третий день по Писанием,/ святии Николаеи Иннокентие, даже до смерти последовали есте,/ да и мы, взирающе на страдания ваша,/ не отринем крестасвоего,/ показующаго путь к Воскресению.

Агнец Божий,/ вземляй грех мира,/ грядет со славою/ судити мир и воздати коемуждо по делом его,/ да сподобимся и мы предстательством новомучеников и исповедников Церкви Русския/ улучити от Судии Праведнаго велию милость.

Слава, глас 6:

Приидите, благочестия рачителие,/ от конец земли Сибирския хладныя/ тепле восхвалим священномученики Николая и Иннокентия,/ тии бо, огнем любви ко Христу распляеми,/ верою Троическою мучителей победиша,/ темже ныне, со упованием предстояще Богу,/ молятся о душах наших.

И ныне, Богородичен, глас тойже: Кто Тебе не ублажит:

Вход. Прокимен дне. И чтения мученическая.

На литии стихиры храма. И священномучеников, глас 2:

Апостолов подражателие/ и мучеников ревнителие,/ новомученицы Николае и Иннокентие,/ безбожнаго прещения не убоявшеся,/ веру Христову даже до смерти соблюдоште./ Ныне же, велие дерзновение ко Спасуимуще,/ Того молитвe спаситися всем нам,/ память вашу честнопразднующим.

Слава, глас 8:

Приидите, верных собори,/ новомученики наша светло почтим,/ вкупе со святители Иннокентием, Софронием и Иоанном их прославляюще,/ и с мучеником Василием Мангазейским ублажающе,/ и со всеми святыми в земли Сибирстей просиявшими/ память их присновоспевающе.

И ныне, глас тойже:

Владычице, прими молитвы раб Твоих/ и избави нас/ от всякия нужды и печали.

На стиховне, глас 2:

Земля Сибирская/ освятися кровию множества новомучеников/ и Церковь Русская обогатися благодатию исповедников,/ темже ныне многострадальцы/ радуются в лице всех святых, в земли Русской просиявших./ Ихже молитвами, Христе Боже, спаси души наша.

Стих: Возваша праведнии,/ и Господь услыша их.

Возваша ко Господу новомученицы,/ зряще храмы Божия поругаемыя,/ и Господь услыша их,/ ныне бо церкви святыя воздвизаются/ и церковное благолепие умножается./ Господи сил, с нами буди/ и сохрани достояние Твое до скончания века.

Стих: Мнози скорби праведным,/ и от всех их избавитя Господь.

Мнози скорби праведным,/ егда за беззакония нечестивых оскудевают вера и благочестие,/ тогда Христос, Агнец Божий,/ Иже всем хочет спаситися/ и в познание истины приити,/ призывает к подвигом крестным избранныя агнцы Своя,/ да, последующе стопам Его,/ с радостию текут в жизнь вечную.

Слава, глас тойже:

Се град Новосибирск, идеже прослави Господь святую память вашу,/ двоице приснославная,/ новоотрадальцы Николае и Иннокентие,/ молит вас ныне:/ охраните град наши всю землю Сибирскую/ от нахождения иноплеменных и междоусобных брани,/ да тихое и благодатное житие поживем/ во всяком благочестии и чистоте.

И ныне, глас тойже:

Непроходимая Врата,/ тайно запечатствованная,/ Благословенная Богородице Дево,/ прими моления наша/ и принеси Твоему Сыну и Богу,/ да спасет Тобою души наша.

Тропарь священномучеником, глас 2:

Велия Православныя веры исправления:/ в лютых гонениях на Церковь Божию,/ яко в чертозах упокоения,/ в ранах и узах радовастеся,/ Крест бо Христов на рамена вземше,/ верою и любовию Тому последовали есте/ в надежди живота вечнаго,/ новомученицы Николае и Иннокентие,/ молитвe Пострадавшаго нас ради спасти души наша.

Ин тропарь, глас 4:

Днесь, благовернии людие, сошедшеся восхвалим/ священномученик Новосибирских двоицу Николаяи Иннокентия:/ тии бо в годину лютых гонений от безбожных пострадаша/ и венцы нетленными от Христа Бога венчашася,/ и ныне, предстояще Престолу Вседержителя,/ Того яко Блага молят/ утвердiti веру Православную,/ сохранить Отечество наше в благоденствии,/ даровати мир и спасти души наша.

На утрени

На Бог Господь: тропарь священномучеником, дважды. Слава, и ныне, Богородичен, глас 2:Вся паче смысла:

По 1-м стихословии седален, глас 4:

Ныне светло празднует Новониколаевск град,/ идеже совершился прославление ваше, священномученицы Николае и Иннокентие,/ ныне паства сибирская духовно торжествует/ и храмы Божии иконами вашими украшаются,/ веселятся грады и веси, идеже Богу усердно послужили есте./ Того молити о почитающих вас,/ да дарует нам велию милость.

Слава, и ныне, Богородичен, глас тойже:

Богородицу песньми немолчными благочестно воспоем вопиюще:/ радуйся, Горо Святая;/ радуйся, Престоле огненосный всех Царя;/ радуйся, ангелов Радосте и мучеников Славо.

По 2-м стихословии седален, глас 4:

Попечение имевше о служении Богу и пастве,/ за веру Православную пострадали есте/ и воистинну обители Пресвятыя Троицы явились есте, священномученицы Николае и Иннокентие,/ таже и, о суетных небрегше,/ Сокровище благих и жизни Подателя стяжали есте.

Слава, и ныне, Богородичен, глас тойже:

Мати Божия Пречистая,/ исцели ны от всякаго греха/ и очисти от всякия скверны душевныя и телесныя,/ и купно с новомученики земли Сибирския/ умоли Христа Спаса нашего спасти души наша.

Величание:

Величаем вас,/ святии новомученицы Николае и Иннокентие,/ и чтим честная страдания ваша,/ яже за Христа/ претерпели есте.

Псалом избранный: Бог нам Прибежище и Сила:

По полиелеи седален, глас 6:

Бодрствуйте, мужайтесь и в вере укрепляйтесь, глаголет апостол Павел;/ новомученицы же, глас его послушавше,/ веру Христову соблюдоша,/ и, ныне дерзновение имуще ко Спасу,/ молят спастися нам.

Слава, и ныне, Богородичен, глас тойже:

Приими, Богородице, песни хвалебныя, от недостойных уст Тебе возносимыя./ Мы бо, на Твой покров надеющеся,/ со святыми новомученики Твое милостивое предстательство прославляем.

Степенна, 1-й антифон 4-го гласа. Прокимен, глас 4:Проидохом сквозе огонь и воду,/ и извел ны еси в покой.**Стих:** Разжегл ны еси, якоже разжизается сребро. **Евангелие от Матфеа, зачало 36.**

По 50-м псалме стихира, глас 6:

Помилуй нас, Боже,/ по велицей милости Твоей/ имолитвами Пречистыя Твоя Матере/ и всех новомучеников Церкви Русския/ беззакония наша очисти.

Канон священномучеников Николаяи Иннокентия, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.

Многими содержими напастьми,/ к вам прибегаем, спасения взыскующе, о святии новомученицы и исповедницы,/ от тяжких и лютых обстояний молитесь спасти нас.

Страстей и пороков безстудных смущают нашествия,/ яже многими печальми сокрушают сердца наша;/ вы же, вернии воины Христови Николае и Иннокентие,/ испросите нам душевную чистоту и крепость,/ священную память вашу совершающим.

Лютая мучения за Христа претерпели есте, славнии новомученицы,/ к вам простираем смиренна моления,/ страданьи вашими в вере укрепляеми,/ испросите Отечеству нашему мир/ и душам нашим велию милость.

Богородичен: Пречистая Дево Богородице,/ с новомученики и всеми святыми земли Сибирския/ умоли Всеблагаго Бога,/ да промыслиением Божественным помилует и спасет всех нас.

Песнь 3

Ирмос: Небеснаго круга Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных Утверждение,/ Едине Человеколюбче.

Верных утверждение суще, святии новомученицы,/ в вере Христове пребыли есте,/ ко пристанищу церковному окормляюще всех хотящих спастися/ и от ересей и соблазнов обновленческих паству свою заступающе.

Молим вас, двоице священная,/ разорити бурю новых соблазнов/ и сетей многовидных нас избавити,/ благочестно память вашу воспевающих.

Сокровище добродетелей духовных испросите нам, святии новомученицы,/ земная богатства и утехи привременныя/ Царства ради Христова презирати научающе.

Богородичен: Исцелений недугов душевных и телесных/ просим от Тебе, Пренепорочная Дево,/ исцелений бо неоскудное сокровище Тя вемы, неизживаемое.

Седален, глас 3:

Кто ны разлучит от любви Божия?/ – Павел возгласи небошественный,/ ни скорбь, ни теснота, ни гонения, ни смерть./ Также и вы, святии новомученицы,/ любовию, яже ко Христу Богу, укрепляеми,/ Небеснаго Царствия достигли есте,/ идеже, со апостолы веселящися,/ веру, любовию споспешествуемую, и спасение вечное/ испросите всем нам.

Слава, и ныне, Богородичен, глас тойже:

Богородице Дево,/ упование христианом,/ покрый,соблюди и спаси на Тя уповающих.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Бурею прегрешений обуреваемы,/ благодатного утешения просим от Христа, тишины Подателя,/ вашими молитвами, новомученицы земли Сибирския.

Наслаждающиеся духовною радостью в памяти вашей,/ святии Николае и Иннокентие,/ славу возсылаем Богу, прославльшему вас.

Одр болезни ко благочестию призывает/ и немощи телесныя просити от Бога исцеления научают./ Вы же,святии новомученицы, болезни многия за Христа претерпевше,/ здравие душевное и телесное испросите воспочитающим.

Богородичен: Надежду на милость Всецарицы Богородицы имуще,/ скорбей и болезней многих избавляемся,/ благодарно за явленная и неявленная к нам благодеяния,/ яко всемогущую Целительницу, воспевающе.

Песнь 5

Ирмос: Просвети нас повелении Твоими, Господи,/ и мышцею Твоею высокою/ Твой мир подаждь нам, Человеколюбче.

Нетленную радость во свете лица Божия улучивше, славнии новомученицы,/ исполните сердца наша неизреченною радостью/ о Бозе, Спасителе нашем.

Избавите нас от бед и погибели вечныя, страдальцы Христовы,/ и благодать, всякое земное мудрование превосходящую,/ испросите теплыми вашими к Богу молитвами.

Просвещения благодатного сподоби нас, Христе, Свете истинный,/ просвещай и освящай всякаго человека, грядущаго к Тебе, Солнцу правды,/ молитвами новомучеников, Тебе ради пострадавших.

Богородичен: Исцели болезни многострастных душ наших, Пренепорочная Богородительнице,/ благостию от Тебе Рождшагося,/ и просвещение душевное скоро подаждь нам.

Песнь 6

Ирмос: Молитву пролию ко Господу,/ и Тому возведу печали моя,/ яко зол душа моя исполнися,/ и живот мой аду приближися,/ и молюся, яко Иона:/ от тли, Боже, возведи мя.

Ныне смерть вам приближися, вопияху гонители ваша,/ егда мнози лжесвидетелие клевету на вы воздвизаху, святии Николае и Иннокентие,/ вы же Христа не отрекостесь,/ но врагов злодейства мужески попрали есте,/ Пасху хваляще вечную.

Иона пророк возопи ко Господу, во чреве китове моляся,/ прообразуя погребение и востание Спасово тридневное,/ новомученицы же Церкви Русския посреде великих страданий моляхуся,/ Пасху славяще вечную.

Будите нам крепкое прибежище,/ славнии страдальцы Христовы Николае и Иннокентие,/ от потопа страстей и бед спасающе нас.

Богородичен: Спаса миру рождающая,/ молимся Тебе, Скоропослушнице нашей,/ спаси от бед рабы Твоя, Богородице,/ многопопечением суетным потопляемая.

Кондак, глас 8:

Веру Христову, яко щит,/ в сердце приемше, святии новомученицы,/ клеветы человеческия и лютых страданий не убоястися,/ но посреде мучений Бога призвасте,/ и ныне ускорите на помощь нашу,/ яко приснославнии.

Икос:

Ангелов подражателие, новомученицы Николае и Иннокентие,/ со ангелы ныне на Небесех радующеся,/ пение хвалебное примите от нас, память вашу совершающих,/ да вашими молитвами причастницы жизни вечныя будем./ Темже, ныне восхваляюще вас, глаголем вам сицевая:

Радуйтесе, яко веру Христову во узах и страданиях соблюдоште;
радуйтесе, яко смирением своим гордыню гонителей посрамисте.

Радуйтесе, любовь ко Христу, за ны пострадавшему, миру явившии;
радуйтесе, сеятели ненавистныя розни мира сего обличившии.

Радуйтесе, яко надежду на Христа непоколебиму сохранили есте;
радуйтесе, яко искавшия погубити душиваша и надеющияся на силу свою немощны явили есте.

Радуйтесе, яко во унижении вашем токмо о Кресте Христовом похвалу приясте;

радуйтесе, яко сораспеншесе Христу, с Ним прославистесе.

Радуйтесе, яко всяк зол глагол Христа ради претерпесте на земли;

Радуйтесе и веселитесе, яко мзда ваша многа на Небеси.

Радуйтесе, Николае и Иннокентие, славнии новомученицы.

Синаксарь

В сей день память совершаем Новосибирских новомучеников Николая и Иннокентия, в годину лютых гонений на веру Православную невинно от богоборцев пострадавших. Гонителие тщахуся возвести на них лжесвидетельства, во еже повинны их сотворити в противлении властем, в уготвлении мятежей и междоусобныя брани. В сих намерении их несмысленнии гонителие новомучеников уподобишася врагом Христовым на судилище у Пилата, иже искаху лжесвидетельства и не обретаху, яко писано во Святем Евангелии (Мф. 26, 59). Но якоже оных лжесвидетельства силы не имеяху, такожде и клеветы мучителей, возводимыя на священномучеников Николая и Иннокентия, пребыша тщетны. Святии явиша непоколебимость веры, неборимость надежды и крепость любве ко Христу. Пострадавшии за веру отцев своих, ныне прославляютеся яв лице всех новомучеников и исповедников Церкви Русския и молятся Богу о спасении нашем. Аминь.

Песнь 7

*Ирмос: От Иудей дошедше, отроцы/ в Вавилоне иногда/ верую
Троицкою пламень пещный попраша, поюще:/ отцев Боже, благословен
еси.*

Вавилон, сиречь греховное смешение,/ спасению мира
противоборствует,/ вы же, новомученицы,/ верую Троицкою безбожие
поправше, Бога призвасте:/ потщися на помощь нашу,/ вся бо можеша, хотяй.

За законы отеческия в Вавилоне благочестивии юноши бедствия
прияша,/ вы же, новомученицы земли Сибирския,/ за веру святую
Православную велия страдания претерпели есте;/ купно со всеми святыми
молите Избавителя Бога о воспевающих вас:/ отец наших Боже, благословен
еси.

За сокровища мирскаяи жизнь привременную/ не пременили есте
сокровища духовная,/ святии новомученицы Николае и Иннокентие,/ но,
врагов ухищрения поправше, непрестанно воспевали есте:/ отец наших Боже,
благословен еси.

Богородичен: Богородице Всепетая,/ телесныя немощи и душевныя
недуги исцели,/ Спаса и Избавителя недуговрождшая.

Песнь 8

*Ирмос: Царя Небснаго,/ Егоже поют вси Ангельстии,/ хвалите и
превозносите во вся веки.*

Егда исполнися чаша страданий новомучеников земли нашея,/ тогда
призре Господь на Церковь Русскую./ И нынепаки зрим земное Отечество
наше/ храмы Божиими и святыми обительми украшаемо во спасение нас
поющих:/ Избавителю Боже, благословен еси.

Страдания ваша честная прославляюще,/ святии Николае и
Иннокентие,/ благодарственная пения воспеваем/ дивному во святых Своих
Богу нашему.

Троицен: О, Троице Святая, Единосущная и Нераздельная,/ спаси всех
нас,/ память новомучеников Новосибирских светло празднующих.

Богородичен: Зрящи поругание святаго удела Твоего, Богородице
Дево,/ умоли Сына Своего суд об Отечестве нашем преложити на милость./
Темже и ныне сохрани грады наша, Заступнице усердная,/ Твои бо есмы
раби,/ да не постыдимся.

Песнь 9

*Ирмос: Воистинну Богородицу/ Тя исповедуем,/ спасеннии Тобою, Дево
Чистая,/ со безплотными лики Тя величающе.*

Тока молений нас, грешных, не отвратитесь,/ новомученицы славнии
Николае и Иннокентие,/ ваша подвиги воспевающих/ и Бога непрестанно
прославляющих.

Радости духовныя сердца наша исполните, святи новомученицы,/
греховныя обычаи отгоняюще/ и во благочестии наставляюще.

Света Твоего зарями пресветлыми просвети нас, Спасе,/ ублажающих новомучеников Твоих Николая и Иннокентия,/ со всеми святыми, в земли Сибирстей просиявшими,/ в нихже препрославлен еси.

Богородичен: Радуйся, Богородице Дево,/ радуйся, земли Русския Покрове,/ радуйся, Сибирския страны Заступнице,/ радуйся, градом и весем нашим ограждение.

Светилен:

Свет Христов просветил есть страну Сибирскую,/ Христовых благовестников проповеданием./ Подвигами же новомучеников свет Христов паки землю нашу осиявает/ и благодать Божественная верным подается.

Слава, и ныне, Богородичен:

Мати Божия,/ сохрани под кровом Твоим град наш/ и всяграды и веси Сибирския/ и всю землю Русскую,/ благодарно заступление Твое воспевающую.

Стихиры на хвалитех, глас 4:

Днесь светло ликуют гради,/ имуще предстательство ваше,/ новомученицы Николае и Иннокентие,/ прославляюще страдания ваша,/ яже за Христа претерпели есте.

Днесь воспевают память священномучеников/ празднлюбцы церковнии,/ днесь страна Сибирская/ подвигами страдальцев Христовых обогащается,/ верныя на похваление их созывающе/ и воспевающе величие Бога нашего.

Днесь новомученицы Иннокентийи Николай/ предстоят Престолу Владычню,/ срадующееся сибирским согражданином,/ веру Православную хранящим/ и святую память их совершающим.

Днесь, вернии людие,/ приидите, поклонимся и припадем ко Христу,/ подающему нам неоскудную милость/предстательством преславных новомучеников,/ озаривших лучами доброт своих страну Сибирскую/ и молящихся присноо душах наших.

Слава, глас 6:

Агнче Божий,/ вземляй грехи мира,/ прими молитву нашу/ и даруй оставление множества грехов/ молитвами новомучеников Николая и Иннокентия,/ благочестно память их совершающим.

И ныне, Богородичен, глас тойже:

Богородице Владычице,/ всех скорбящих Радосте/ и Заступнице всех христиан,/ ненадеющихся Надеждо,/ моления наша благоутробно прими/ и Сыну Твоему и Богу принеси/ о спасении душ наших.

Славословие великое. И отпуст.

На Литургии

Блаженны от канона песни 3-я и 6-я. Прокимен, глас 4: Святым иже суть на земли Его,/ удиви Господь вся хотения Своя в них. Стих: Предзрех Господа предо мною выну,/ яко одесную мене есть, да не подвижуся. Апостол к Римляном, зачало 99. Аллилуиа, глас 6: Священницы Твои облекутся в правду/ и преподобнии Твои возрадуются. Стих: Бог нам Прибежище и Сила, Помощник в скорбех обретших ны зело. Евангелие от Иоанна, зачало 52. Причастен: В память вечную:

Молитва

О, святии священномученицы Николае и Иннокентие! Ныне усердно притекаем к вам и со умилением молимся: молитвами вашими утвердите веру Православную, укрепите надежду нашу на помощь Божию, да любовью жертвенною соединени будем в служении Богу и ближним во спасение душ наших. Градом и весем нашим испросите от Бога благословение, земли Сибирстей от нашествия иноплеменных ограждение, отпадшим от веры Православныя светом Христовым просвещение, служителем Церкви о спасении пасомых ревность и попечение, чадом в заповедех Божиих научение и всем чтущим вас в делех веры и любви благое поспешение, да, вашими молитвами укрепляеми, прославим Отца и Сына и Святаго Духа, ныне и присно и во веки веков. Аминь.